

Govor predsjedavajućeg Zajedničke komisije za ljudska prava Parlamentarne skupštine BiH Borislava Bojića na Konferenciji povodom obilježavanja 10. decembra - Međunarodnog dana ljudskih prava "Ostvarivanje prava na rad bez diskriminacije"

Sarajevo, 4. decembar 2017.

"Poštovane ekscelencije, uvaženi ministri, cijenjene kolege poslanici i delegati, predstavnici izvršne vlasti i nevladinih organizacija, cijenjeni gosti.

Čast mi je pozdraviti vas ispred Zajedničke komisije za ljudska prava Parlamentarne skupštine BiH i otvoriti Konferenciju povodom obilježavanja 10. decembra, Međunarodnog dana ljudskih prava pod nazivom „Ostvarivanje prava na rad bez diskriminacije“, koju organizuje Zajednička komisija za ljudska prava Parlamentarne skupštine Bosne i Hercegovine u saradnji sa Ministarstvom za ljudska prava i izbjeglice BiH.

Posebno se zahvaljujem Misije OEBS-a u Bosni i Hercegovini, uz čiju podršku je Konferencija i organizovana.

Razvoj ljudskog društva doveo je do kategorizacije osnovnih ljudskih prava. To bi, zapravo trebala biti prava koja se ne smiju zanemarivati, a također, ne smiju se povrijediti.

Svake godine Zajednička komisija za ljudska prava obilježava 10. decembar- Međunarodni dan ljudskih prava, te svake godine posebnu pažnju posvetimo jednoj od kategorija osnovnih ljudskih prava.

Ove godine posebnu pažnju posvetit ćemo „pravu na rad“,koje se, posmatra počesto sa jednog deklarativnog karaktera. Ono jeste kao pravo utvrđeno Opštom deklaracijom, najvišim aktima svake države, zakonima i podzakonskim aktima. Ali, kako se ovo pravo ostvaruje? Da li samo zaposlenje znači da je pravo ostvareno? Da li je prestanak radnog odnosa povreda ovog prava?

Pitanje nezaposlenosti posebno je teško pitanje u BiH. Da li je sama činjenica nemanja posla po samom smislu povreda osnovnog prava? Pored ovih otvaraju se mnoga druga pitanja vezana za rad, kao što je visina nadnice, socijalno i zdravstveno osiguranje, pravo na penzionisanje i mnoga druga prava- odmori, odsustva i sl.

Pravo na rad temeljno je ljudsko pravo. Ostvarivanje ovog prava u potpunosti vodi do konačnog cilja iskorjenjivanja siromaštva. Vodi prema poboljšanju životnog standarda, stvaranju novih prilika i naposljije ostanku mladih ljudi u Bosni i Hercegovini. Odlazak mladih ljudi, loš natalitet sve je usko vezano sa problemom diskriminacije prilikom zapošljavanja, nemogućnošću da se ostvari temeljno ljudsko pravo na rad.

Mi moramo da krenemo u obračun sa ovim problemima, kako država tako i njeni entiteti i svi konstitutivni narodi. Ja imam nadu da ćemo se sa ovim problemom uspješno izboriti. Naime za mene nada nije samo sjedenje i čekanje da se nešto desi. Za mene je nada da izađemo na teren i uhvatimo se u koštac sa svim problemima koje imamo. Rad, borba i na kraju pobjeda u obračunu sa duboko ukorijenjenim sistemskim problemom diskriminacije, to je za mene nada.

U radu današnje konferencije učestvuju predstavnici državnog i entitetskih parlamenata, relevantnih ministarstava i agencija, Saveza sindikata, nevladinih i međunarodnih organizacija i predstavnika nacionalnih manjina.

Na konferenciji će sa više aspekata biti razmatrano jedno od osnovnih ljudskih prava - pravo na rad, odnosno podizanje svijesti o ljudskim pravima stvaranjem prostora koji se odnosi na zapošljavanje, jednake mogućnosti u pitanjima zapošljavanja, zabranu diskriminacije u zapošljavanju, te mogućnosti obezbjeđivanja pravičnog tretmana i uključenosti za sve u Bosni i Hercegovini.

Dame i gospodo,

govori i riječi neće riješiti probleme. Moramo riječi pretvoriti u djela, moramo raditi i moramo djelovati.

Mi ljudi smo svi stvoreni jednaki. Jednako imamo svi pravo na rad i da živimo od svoga rada, vodimo dijaloge, pretvorimo riječi u djela.

Zahvaljujem!"